



Äntwert vum Minister fir Mobilitéit an ëffentlech Aarbechten op d'parlamentaresch Fro n° 6347 vum 14. Juni 2022 vum Här Deputéierten Marc Goergen.

Den honorabelen Deputéierte freet Prezisiounen iwwert d'Immatrulationsplacke vu Gefierer déi zu Lëtzebuerg nach am Ëmlaf sinn.

Aktuell sinn alleguerten d'Formater vun Immatrulationsplacken déi jee zu Lëtzebuerg autoriséiert goufen nach am Ëmlaf. Esou laang de Proprietär vum Gefier seng Plack net ännert oder d'Gefier definitiv ofmellt, bléiwen och déi Placke gültig, déi ee Format hunn dat net méi dem Règlement grand-ducal modifié du 26 janvier 2016 relatif à la réception et l'immatriculation des véhicules routiers entsprechen. Dës eeler Formater am Ëmlaf kënnen zesumme gesat sinn aus: zwee Buschtawen an dréi Zuelen, ee Buschtaf a véier Zuelen, dréi Zuelen, an zwou Zuelen an zwee Buschtawe fir Cyclomoteurs, woubäi d'Gréissten och a Funktioun vun dëse Kombinatiounen ënnerschiddlech sinn.

Den Tableau ënnendréiner schlësselt d'Unzuel vun den nach immatrikuléiert Placken (ugemellt oder temporär ofgemellt) an deenen eenzelen eelere Formater op:

Placke Kombinatioun	Placken am Ëmlaf
<i>2 Buschtawen an 3 Zuelen</i>	18.232
<i>1 Buschtaf a 4 Zuelen</i>	14.533
<i>3 Zuelen</i>	55
<i>2 Zuelen a 2 Buschtawen</i>	583

Den Transfert vun enger Plack an engem eelere Format vun der Buschtawen-Zuele Kombinatioun op een anert Gefier ass effektiv net méiglech. Esou gesäit den Artikel 16 vum uewe genannte groussherzogleche Règlement vir, datt fir all Gefier, dat entweder néi ugemellt gëtt, importéiert gëtt oder zu Lëtzebuerg de Proprietär wiesselt, muss eng Nummer aus der « série courante » (2 Buschtawe 4 Zuelen) oder eng personaliséiert Nummer (2 Buschtawe 4 Zuelen, respektiv 5 Zuelen oder 4 Zuelen) attribuéiert kréien. Bei de Cyclomoteurs muss eng 2 Buschtawen 2 Zuele Kombinatioun benotzt ginn. Aner Kombinatioun sinn net méi autoriséiert. Dëst soll sécherstellen datt no an no nëmmen nach déi gültig Formater am Ëmlaf bleiwen, déi och den europäeschen Dimensiounen entsprechen.

Zousätzlech kënn derbäi datt een Transfert vu Placken, virun allem vun engem Proprietär op een aneren, ëmmer de Risiko mat sech bréngt, datt mat dësen eelere Placken oder och den néie Placken, bei deene verschiddene Buschtawen an Zuele Kombinatioun deelweis staark nogefrot sinn, och Handel bedriwwen gëtt.

Lëtzebuerg, den 14. Juli 2022

De Minister fir Mobilitéit an ëffentlech Aarbechten

(s.) François Bausch